

Dus candidats per in sez

Demai che la commembra dil parlament dalla vischnaunca da Glion, Michal Karin Hohl ei vegnida elegida en suprastanza, sto il suveran remplazzar il sez vacant el parlament communal ils 22 d'october 2023. A disposiziun stattan Sarina Casanova da Glion e Daniel Schneider da Luven. Tgi ein ils dus candidats? Votantas e votants han denton era la pusseivladad da plazzar autras persunas sin ils cedels da votar communal.



Sarina Casanova candidescha per in sez el parlament communal dad Ilanz/Glion.

Sarina Casanova Glion (senza partida)

Igl onn 2012, cu las 13 vischnauncas dalla Foppa han decidiu la fusiun dalla vischnaunca Ilanz/Glion, haveva *Sarina Casanova* 9 onns. La proxima fin dalla jamna, ils 22 d'october 2023, candidescha ella per in sez el parlament communal da quella vischnaunca. Sarina Casanova ch'ei carschida si a Glion ha fatg in emprendissadi da geomatrica e studegia il mument planisaziun dil marcau, traffic e territori alla Scol'aula dil fatg dalla Svizra Orientala a Rapperswil. La giuvna ei iniziata e presida dalla cumissiuun da giuventetgna dalla vischnaunca dad Ilanz/Glion che ha organisau l'emprema sessiuun da giuventetgna la primavera 2023. «Entras la cumissiuun da giuventetgna sundel jeu vegnida en contact cun la politica locala.» E per quella politica locala vul Sarina Casanova era s'engaschar el parlament communal. Cunzun era per damondas che pertucan la giuventetgna. «Jeu vi cuntinuar cun miu engaschi per ils interess dalla giuventetgna e possibilitar ad ella ina representaziun politica pli ferma en nossa vischnaunca. La finala dependa il futur da nossa vischnaunca dils giuvens.» Aschia che Sarina Casanova ei promta per far politicamein in proxim pass, sco ella puntuescha. Quei sch'il suveran dalla vischnaunca dad Ilanz/Glion elegia ella la proxima fin dalla jamna. (fmr/ac)



Commember il parlament dad Ilanz/Glion vul era Daniel Schneider daventar.

Daniel Schneider Luven (senza partida)

Daniel Schneider ei d'annada 1991 ed ei carschius si a Ramsen el cantun Schaffusa. El ha studegiu architettura e viva dapi siat onns a Luven. Leu nua che Daniel Schneider ha empriu romontsch, nua ch'el s'enta dacasa e nua ch'el ei gia s'engaschaus ell'Uniun da giuventetgna. En Surselva ha el empriu d'enconuscher sia dunna e cun ella ed amitgs eis el gest vid renovar a Luven ina casa veglia ch'els conjugals han saviu acquistar. «Sco architect sefatschentel jeu adina cun damondas, co ils detagls dad in baghetg funcziunan e nua ch'ins sa e sto meglierar per ch'ei funcziuni meglier.» Il giuvan architect independent vesa cheu certas parallelas cun la veta en ina vischnaunca ed el s'interessescha co quei mintgagi funcziuna e nua ch'ei dat problems e co quels problems vegnan sligiai. «Jeu sun promts da contribuir alla veta da mintgagi ella vischnaunca ed aschia s'interesseschel jeu era per il mandat politic el parlament communal.» Ils siat onns vargai ha Daniel Schneider empriu d'enconuscher la Surselva e la vischnaunca nua ch'el ei dacasa. Experiencescha politica ha Daniel Schneider buc, quella experiencescha eis el denton promts da rimnar priu il cass ch'il suveran dalla vischnaunca dad Ilanz/Glion elegia el dumengia proxima, ils 22 d'october 2023, sco commember dil parlament communal. (fmr/ac)

Habitaziuns novas ella scola veglia

Ella anteriura scola da Flond ha la vischnaunca Sursaisa/Mundaun realisau quater habitaziuns che stattan a disposiziun a persunas e famiglias indigenas. Las habitaziuns han gia anflau affittaders che san surpender ils habitadis el decuers dil december 2023. La sonda proxima ei la populaziun envidada da prender investa.

ANDREAS CADONAU/FMR

«Problems da schar vi las habitaziuns novas havein nus giu negins», gi il menader digl Uffeci da baghegiar dalla vischnaunca Sursaisa/Mundaun, *Lukas Roth*. El ei responsabels en vischnaunca per las immobilias communalas e ha accumpignau la midada dalla anteriura casa da scola da Flond en in spazi da habitar per indigens. «Ina dallas habitaziuns surpren ina famiglia cun affons che setrai neutier dalla Basa.» Tenor las indicaziuns da Lukas Roth ei ina ulteriura habitaziun ida ad affittaders dalla regiun e las duas ulteriuras surpandan persunas che vivan gia en vischnaunca. Sco quei che Lukas Roth explichescha ei il spazi da habitar per indigens rars ton ella vischnaunca da Sursaisa/Mundaun sco er en autras vischnauncas sursilvanas. «La scola veglia da Flond vegn buca pli duvrada per il menaschi da scola.» Aschia che la vischnaunca ei sedecidida da realisar ella scola veglia quater habitaziuns. E per quella midada ha la vischnaunca impundiu dapli che dus milliuns francs.

Habitaziuns e garascha sutterrana

Realisau ha la vischnaunca ella scola veglia quater habitaziuns inclus ina garascha sutterrana – duas habitaziuns da 4,5 stanzas e duas da 3,5 stanzas. La vischnaunca lai vi las habitaziuns tenor grondezia e sco la habitaziun ei situada enteifer il baghetg per in tscheins meisil da 1170 francs entochen 1580 francs. Vitier vegnan



La casa da scola veglia da Flond che ha surviu duront decennis sco liug d'instrucziun ha retschiert in niev intent e dat ussa suttegt a habitonts en quater novas habitaziuns.

FOTO MAD

aunc il cuosts auxiliars e 120 francs per meis per in plaz ella garascha sutterrana sche quei vegn giavischau. Il schef digl Uffeci da baghegiar ei dil meini che la vischnaunca posi aschia metter a disposiziun habitaziuns per indigens per in tscheins pagabel. Las habitaziuns ein contonschiblas cun in ascensur e sin tetg ei vegniu montau in indrez solar. Entschiet cun las lavurs da construcziun han ils impres-

saris il matg 2023 e sco quei che Lukas Roth conceda, ein ins sin buna via da finir tenor termin. Avon ch'els affittaders surpandan lur novs habitadis ha la populaziun da Sursaisa/Mundaun la pusseivladad da prender investa. Tenor comunicaziun el Fegl Ufficial Surselva organisescha la vischnaunca in gi dallas portas aviatas e quei sonda ils 21 d'october 2023 denter las 10 e las 14.00.

GLION

Daguot e daguot fa puoz

La destillaria Daguet da Glion cun ils brischavinars *Robert Cathomas* e *Beni Simeon* appartegnan allas meglieras destillarias svizras. Els ein vegni undrai la fin dalla jamna vargada a Basilea cun il tetel «Brischavinars digl onn». Alla Disti Suisse, la premiaziun svizra da spirituosas organisada mintga dus onns, ein nov differentes vinars ord la cuschina dalla destillaria Daguet vegni undrai en siat differentas categorias cun ina medaglia d'aur. Per recaltgar il tetel «Brischavinars digl onn» ein silmeins quater medaglias d'aur en quater differentas categorias necessarias. Sper la destillaria Daguet han aunc nov ulteriuras destillarias svizra retschiert il tetel da brischavinars digl onn. Dapli medaglias d'aur che Daguet han sulet duas destillarias recaltgau, nummadamen la Fassbind SA dad Oberarth e la Humbel SA da Statten.



Ils brischavinars dalla destillaria Daguet da Glion, Robert Cathomas (sen.) e Beni Simeon, ein vegni undrai cul tetel «Brischavinars digl onn.»

FOTO ANDREAS CADONAU

Plascher dalla reconuschienscha

Ils dus brischavinars sursilvans che han entschiet cun lur pissiuun da barschar vinars senter la pensiuun ein satisfatgs dalla reconuschienscha. «Tonpli perquei che nus essan sulet ina pintga destillaria.» Robert Cathomas gi che Daguet hagi per exempel recaltgau ina medaglia d'aur per lur «kirsch». «Che nus barschein in silmeins aschi bien sche buc in meglier vinars da tschereschas en Surselva ch'ellas regiuns da tschereschas sco Basilea-Campagna ha secapescha dau da discutir.» La Disti Suisse ha nudau alla concurrenza digl onn 2023 ina participaziun da record, sco quei ch'els organisatur scrivan. La schuria ha giu da degustar e premiar 790 products da 135 destillarias. Buca meins che 30% dapli vinars che alla concurrenza d'avon dus onns. La destillaria Daguet ei satisfatga ch'igl ei reussiu ad ella sco pintga destillaria da recaltgar il tetel brischavinars digl onn. «Per nus ei barschar vinars aunc adina empau in hobi, in al qual nus dedichein dus entochen treis dis per jamna», di Robert Cathomas. (fmr/ac)

TRUN

Inaugurau l'illuminaziun dalla piazza da ballapei

La sonda vargada ha il Club da ballapei Trun/Rabius inaugurau l'illuminaziun dalla piazza da ballapei a Trun/Pustget. Cun in aperitiv per ils sponsurs, in giug da ballapei denter anteriurs giugadurs e amitgs dil club da ballapei ed in giug da campiunadi encunter Domat han ins priu reconuschienscha dad ina investiziun realisada en cuort temps. Il cassier dil CB Trun/Rabius *Fabian Collenberg* ha getg ch'ei seigi reussiu da recaltgar detg spert ils 180'000 francs che seigien stai necessaris per finanzia l'illuminaziun nova. Inaga grazia al sustegn dallas vischnauncas da Trun e Rabius. «Ina contribuziun da 60'000 francs ei vegnida dall'instituziun che senumna Alpinfra, ina organizaziun che sustegn infrastruttura ella muntogna.» Il rest han divers sponsurs locals, il cantun Grischun ed il davos aunc la cassa dil club e la bar da tscheiver contribuui. Sco quei che Fabian Collenberg gi eis ei stau pli sempel da finanzia l'illuminaziun che quei ch'els responsabels dil club han manegiau. Aschia che l'illuminaziun nova ei vegnida realisada duront la stad passada. Entochen ussa era sulet la piazza da ballapei a Rabius/Igniu illuminada. Quella piazza era magari surcargada cun ils trenaments dallas singulas equipas duront las seras dalla primavera e digl atun. Ussa ha il club che dumbra circa 180 commembras e commembers activs e passivs a disposiziun duas piazzas illuminadas. In fatg che levgescha d'organisar ils trenaments. (fmr/ac)

reclama

FLEXO
Innovative Handlauf-Systeme

Unverbindliche
Beratung bei Ihnen
zu Hause

Treppengeländer
Innen/Aussen

☎ 081 599 50 65
www.graubuenden.flexo-handlauf.ch